

Edizioni

- letto 464 volte

Topsfield

I.

Un sonet m?es belh qu?espanda
per ma dona esbaudir,
si cum selh que no demanda
so que plus volgra jauzir:
mas d?aitan no·m puesc suffrir
que no·lh mostr? hueimays,
sivals temens ab chansos,
cum suy d?enansar coitos
selh joy don ylh m?atruanda.

II.

Pechat fai qui m?atruanda,
que res mas lieys non dezir;
e qui mon afar demanda,
pot d?autras domnas auzir
cum n?i a manhtas en azir
quar ieu no·m biays,
e lur estauc orgulhos,
e vuel mais remaner blos
ses amor qu?autra·m reblanda.

III.

Lieys sola·m platz que reblanda,
qu?a dreitz en puesc grans laus dir;
e, qui de lieys mi demanda,
no·n puesc ben dizen mentir;
quar mielhs qu?om savis cossir
fai totz sos assays,
e totz sos faitz belhs e bos,
pueys a d?avinens faissos
tan cum Beutatz en guaranda.

IV.

Soven me mostr? en guaranda
lo cors, que·m fai abelhir

sas grans beutatz, e·m demanda
que fas, quan no la remir;
d?aqui movo·l gran sospir,
e·l volers m?en nays
que·m fai languir amoros:
per qu?ieu la prec ad estros
m?acuelha, si no·m desmanda.

V.

Per Crist, s?aquesta·m desmanda,
no y a plus mais del murir,
que de tot outra demanda
m?a fag s?amistat partir;
si·s vol, lo sieu pot delir,
cum selh que Dieu trays;
mas pauc li val tracios,
qu?anc sa par non cre que fos,
ni gensor non pais vianda.

VI.

Ben sabetz ab qual vianda,
bela domna, puesc guerir,
qu?ieu so·l folhs qui·lh say demanda,
si m?o voletz aculhir:
e pus mi·us plac enrequir,
no vulhatz qu?abays,
que·l mieus mals es dans a vos,
e totz mos bes vos es pros,
tan com sobre me s?espanda.

VII.

Et ie·us sui verays,
quar me meteys tenc de vos,
e totz mos faitz bels e bos
e Miravallh de comanda.

VIII.

Reyals senher guays,
Mos Audiartz, cars e bos,
eu domney, fe que dei vos,
la gensor qu?el mon se randa.

IX.

E no·m desman si no·m manda!

- letto 567 volte